

Ha'u-nia respeitus ba:

- Señora Sunita Caminha, Diretora Eskritóriu UN Women
- Señora Munkuhtuya Altangerel, UNDP nia Representante Rezidente
- Señor Armando da Costa, Diretor Jerál, Sekretaria Estadu ba Igualdade Jéneru no Inkluzau

Bondia kolega sira hotu.

Onra boot ida bele hola-parte iha YSEALI nia Akademia Lideransa ba dahuluk iha Timor-Leste. Iha tinan hirak ikus ne'e dezde Timor-Leste tama iha Ministériu Negósiu Estranjeiru Estadus Unidus nia Inisiativa Líder Foinsae Sudeste Aziátiku, ita haree ona número membru Timoroan nian sae too kuaze membrus liu 2000. Ami mós haruka ona joven Timoroan liu 50 ba Estadus Unidus no nasaun sira iha rejiaun Sudeste Aziátiku hodi serbisu-hamutuk ho sira-nia omólogo sira dezenvolve programa-hirak ne'ebé responde ba dezafius globais ne'ebé ita hotu-hotu hasoru.

Silvia Correia de Araújo, líder husi Timor-Leste nia Rede Feto YSEALI, hanesan feto-ida entre feto joven sira ne'ebé viaja ba Jakarta hamutuk ho feto joven Timoroan nain rua seluk, Ismenia Cabreira no Jonia Leite Soares, iha fulan Juňu tinan 2019 hodi partisipa iha YSEALI nia Akademia Lideransa Feto.

Silvia komesa husi tempu ne'ebá hala'o ona programas barak iha Timor-Leste, halibur feto foinsae sira hodi apoia malu iha ida-idak nia dezenvolvimentu profisionál no pesoál. Nia mós sai ona defensora forte ba meiu-ambiente liuhusi lidera programa kuda aihoris no konservasaun bee. Feto foinsae sira ohin iha ne'e maka Timor-Leste nia futuru. Sira ne'e líderes inovadór, matenek, no forte ne'ebé halao asaun hodi hadi'ak liután sira-nia komunidade sira .

Durante pandemia globál COVID-19 ita haree ona líder foinsae Timoroan sira hamriik hodi responde ba dezafiu foun ne'e. Enkuantu pandemia espalla iha mundu tomak, ami-nia Embaixada iha Dili ne'e hetan aprosimasaun husi membrus YSEALI sira ne'ebé hakarak halo asaun hodi prevene propagasaun COVID-19 iha sira-nia komunidade. Ho apoiu-orsamentu husi ami-nia Seksau Asuntus Públiku, líder foinsae sira ne'e dezenvolve ona programa sira no konsege ba too kedas iha família liu 600 hodi fahe informasaun importante kona-ba saúde iha komunidade kbiit-laek sira.

YSEALI nia Akademia Lideransa Feto ne'e ho objetivu dezenvolve bazeia ba susesu hirak ne'e, liuhusi hakbiit feto barak liután hodi sumi papel lideransa iha sira-nia komunidade no dezenvolve sira-nia karreira. Iha Estadus Unidus Amérika, feto sira hetan ona respeitu boot liután iha política, negósiu, no sosiedade tanba deit feto sira serbisu-hamutuk hodi promove sira-nia direitus. Maibé iha servisu barak liután maka presiza atu halo. Feto sira iha Estadus Unidus Amérika kontinua defende mudansa iha lejizlasaun ne'ebé haforte direitus umanus no direitu feto sira-nian no promove kestaun sira hanesan konservasaun ambientál, igualdade rasiál, no liberdade religioza.

Inspira tebes bele haree feto foinsae Timoroan sira ohin hola-parté iha programa ida-ne'e no serbisu atu alkansa objetivu sira ne'ebé ha'u fiar feto sira iha mundu tomak fahe ba malu. Ha'u fiar katak buat ne'ebé importante liu atu lembra maka ita feto sira presiza hamriik defende rasik ita-nia an no keta tauk espresa ita-nia pontu-de-vista. Ita presiza haree valór iha ita-nia konviksaun rasik no servisu no ideias husi feto maluk sira seluk. No ita presiza apoia malu, labele kompete malu ka hatuun malu. Ita iha direitu atu ema rona no inklui iha aspetus hotu husi moris política, ekonómika no sosiál.

Ha'u kongratula Silvia, Jonia, Ismenia, Elfy, Zezinha, no Benvinda ba sira-nia servisu exelente hodi promove líder feto sira . Ha'u mós hakarak agradese imi-hotu tanba hola-parté ona iha ekipa Akademia Lideransa Feto iha sira-nia servisu. Ha'u agradese tanba líder importante Timoroan sira hola-parté mós iha esforsu ida-ne'e, balun atu partisipa iha semináriu sira ne'ebé sei halao iha loron hirak tuirmai. Sira sei fó konsellu no orientasaun valiozu ba membrus husi Akademia Lideransa Feto Foinsae no ita espera ligasaun hirak ne'e kontinua ba oin. Importante tebes atu Timor-Leste nia líder atuál sira apoia ho ativu feto foinsae Timoroan sira nia aspirasaun sira ba lideransa. Rona malu no koalia sai halo ema rona ita-boot sira-nia lian. Ha'u hein ba oin haree ita-boot sira hotu sai futuru líderes Timor-Leste nian!

Obrigada barak